

— **WALAASHAYEY!** —
RAMADAAN YAAD NOQON
SALMA MISE XANNAAN?



— **QORE :** —
AXMED DAAHIR (AXMED KHAYR)

SALMA

Ramadaan, waxa ay u soo gashay iyada oo aad u dhibsanaysa, diiqad badanna ka dareemaysa in Bishii Xabsiga iyo Gaajada ahayd ay u bilatay!

Xaalkeedu waxa weeye:

| | | |
|---------------------------------|-----|---------------------------|
| فواصلُ شربَ ليلِكَ بالنَّهارِ | *** | إذا العشرون من شعبان ولّت |
| فإنَّ الوقتَ ضاقَ على الصَّغارِ | *** | ولا تشرب بأقداح صغار |

“Labaatankii Shacbaan hadday dhabar-jeediso, oo gabaabsi noqoto Bishii Shacbaan, Cabitaankaagga xidhiidhi oo ha kala jarin Habeen iyo Maalin, hana ku cabbin Weel yar, ee Weel wayn oo aad Biyaha kaga haagto ku cab, Waqtiggii Carruurtii yarayd ee rabtay in ay Cuntada ka sii dheregto Ramadaan wuu ku cidhiidhtoomay’e!”

Habeenkii ugu horreeyay ee ay Ramadaan bilatay, waxa ay SALMA ku saamalayshay Khadka, mayna cashaynin ilaa ay gaadhaysay 1:00

Habeennimo, Cashadii dabadeed waxa ay u kacday si ay u seexato, iyada oo diyaarsanaysa Sariirteedii ayaa waxa soo dhacay Tilfoonkeedii! Way qabatay, mise waa Wiil (Asaxaabteeda!) ka mid ah oo ugu bishaaraynaya Ramadaan, mahadnaqii ayaa la dheerraaday ilaa saacaddu ka gaadhaysay 3:00

Habeennimo! Markaas ayay khadkii iska xidhay... ayna seexatay.

XANNAAN

Muddo aan yaraynba waxa ay ku ducaysan jirtay, ilaahayna ka baryi jirtay in uu ilaahay Caafimaad qab ku gaadhsiiyo Bisha barakaysan ee Ramadaan. Habeenkii ugu horreeyay ee Ramadaan ay bilatay, waxa ay iska xaadirisay Masjidkii Xaafaddooda iyada oo Xijaabkeedii u dhammaystiran yahay, kana fogaatay wax kasta oo udug ah, Waddada waxa ay ka maraysay dhinacyadeeda, Raggana kumay cidhiidhyayn Badhtanka Waddada, iyada oo farsoomaysa amarkii suubbanaha Nabi Muxammad (ANKH)

"ليس لكن أن تحقن الطريق عليكن بحافات الطرق"

“Dumarooow! Idiinma sugnaanin in aad Waddada Badhtanka ka martaan, Dhinacyada Waddada mara”

Masjidkii markii ay gaadhay waxa ay tukatay Laba Rakcadood oo Salaan Masjid ah, Dabeetana duco ay ilaahay Gacmaha hoos roorsanayso ayay bilowday, aad ayay ugu faraxsan tahay in ilaahay (Sw) ku soo gaadhsiiyay Ramadaan Caafimaad iyo Iimaan, Salaaddii Cishe waxa ay ku tukatay Khushuuc aan caadi ahayn... markay faralkii gudatayna waxa ay la timi Adkaartii Salaadda dabadeed la akhriyi jiray

أستغفر الله.. أستغفر الله.. أستغفر الله.

اللهم أنت السلام ومنك السلام تباركت يا ذا الجلال والإكرام

Iyo adkaarta kale ee la mid ka ah ee salaadda dabadeed la akhriyo.

Dib ayay u dhigatay Sunnihii Cishaha ka dambeeyay, maadaama uu ku fadli badan yahay Gurigga.

Isla markii ay Guriggii soo gaadhayba way cashaysay, waxa ayna isku diyaarisay Hurdo.. wayna seexatay markay Adkaartii Hurdada akhriday dabadeed, si ay ugu kacdo Suxuurta, maxaa yeellay suxuurtu waa barako, sida Nabigeennu (ANKH) inoo sheeggay.. habeenkii ayay kacday, wayna suxuuratay, Dabeetana Musxafkeedii ayay soo qabsatay si ay wirdigeeddii u akhrido, Adaankii labaad ayaa la addimay, dabeetana Sunnihii Subaxa ayay tukatay, waa la qiimay waxa ayna tukatay salaaddii subax, dabeetana waxa ay akhrisatay adkaartii salaadda ka dambaysay, iyo adkaartii subaxa, intaa dabadeed way seexatay.

SALMA

Saacaddii II:50 Duhurnimo ayay kacday, ogsoonnow oo Sidii ay u seexatay 3:00 Habeennimo ayay xilligaa toosaysaa! Salaaddii subax ayay tidhi xilligaa ayaan tukanayaa! Way yara foorfoorsatay, dabeetana Musalsalkeedii oo la yara update gareeyay Ramadaanta ayay hoos fadhiisatay.. musalsalba musalsal ayuu u sii dhiibay.. dabeetana khadkii ayay furtay, saaxibaddeed ayay wacday si ay Dhacdooyinkii xiisaha lahaa ee Musalsalka maanta uga dhacdo. Dabcan kama madhna in ay ka warranto dharkii ay xidhnaayeen Aktariishooyinku maanta sida ay u shidnaayeen, sidaas oo kale kama madhna in ay Heblaayada

jaarkeeda ah ee Reermiyadda ah ka sheekayso Labbiskeeda iyo socodkeeda (Xan)!

Dabeetana waxa soo wacay (Saaxiibkeed!) waxa ayna uga bariday ilaahay in uu soonkiisa ka aqbalo, isaguna isaga oo ka falcelinaya ducadeedaas ayuu Love u saaray! Aad ayayna arrintaa ugu faraxday, farxaddaas aawadeedna waxa ay daaratay heesteedii ay ka heli jirtay!!!

XANNAAN

Subixii ayay xilli hore iska toostay iyada oo firfircoon, kuna celcelinaysa adkaartii hurdo-kakaca, waxa ayna isku diyaarisay Salaadii Duxada wayna tukatay, dabeetana dhinicii aabbaheed ayay soo aadday waxa ayna ka dhunkatay Gacmha, waxa ayna gashay Kijada si ay u caawiso hooyadeed, dabeetana wirdigeedii ayay sii wadatay intay musxafkeedii soo qabsatay, Salaaddii duhur ayaa soo dhowaatay, waxa ayna isku taagtay Sunnihii ka horreeyay Duhur ee afarta ahaa, Duhur ayaa la qiimay waxa ayna tukatay Salaad ay ku khushuucayso, Salaaddii sunnaha ahaydna way ka daba gaysay, dabeetana waxa ay soo qabsatay Kitaab siira ah si ay siiradii Rasuulka (ANKH) wax uga akhrisato, dabeetana waxa ay gashay nususaace wax aan ka badnayn khadka, iyada oo mawaaqic la hubo oo wanaagsan galaysa.

SALMA

Casar ayaa la addimay, way wayso qaadatay, hase ahaatee waxa ay ku mashquushay Call ay u soo dirtay saaxiibteed, waxa ayna isla meel dhiggeen in ay suuqa u baxaan, si ay waqtigan cidhiidhiga ah ee aan soconayn ay u soo lumiyaan! Waxa ay baxday iyada oo Dhar ku dheggaan oo wada udug ah xidhan, intii la sii socdayna afka mar la iskuma darin, Shaydaanka ayaa ka subxaanaysanayay falalka ay Ragga hortooda ka samaynayaan, dabeetana waxa ay soo noqdeen maqrib wax yar ka hor! Salaaddii casarna wali may tukan, dabeetana waxa ay foorfoorsatay salaad aan khushuuc lahayn, waxa ayna afurtay iyada oo uftaa haysa!

XANNAAN

Salaaddii casar ayaa la addimay, way waysaysatay wayso ay ku xeeldheeraanayso, wayna tukatay, dabeetana adkaartii salaadda dabadeed ayay akhrisatay iyo adkaartii Galabta, dabeetana barnaamij diineed ayay ka daawatay sheekh ay ku xidhnayd, intaa dabadeed afuradii ayay wax ka diyaarisay iyada oo qalbigeeda iyo carrabkeeduba Xus ilaahay ku mashquulsan yihiin.

Intii aan la afurin waxa ay afuro u geysay Islaan Da' ah oo deriskooda ahayd, si ay ajarkii weynaa ee afurinta Ruuxa Muslimka ah u hesho.

Waa la addimay maqrib, wayna afurtay wayna ducaysatay, maadaama xilligaa ducada aan la celin.

SALMA

Markay afurtay dabadeed waxa ay sii wadatay musalsalkeedii , Cishana may tukan ilaa 1:00 Habeennimi Goor-sheegtu gaadhaysay, Dabcan taraawiix wax la yidhaahdaa uguma jiraan qorshaheeda, marmar hadday tidhaahdo taraawiix ayaan aadayaana Ballan ayay ku saxanaysaa!

Ramadaanteeda oo dhan saas ayay Ciyaar iyo dambi ugu qaadataa.

XANNAAN

Markay afurtay waxa ay isku diyaarisay Salaaddii maqrib, way tukatay iyada oo raacisay Sunnihiisiina, dabeetana Wirdigeedii wax ka mid ah ayay akhrisatay, salaaddii cishe ayaa la addimay waxa ayna isku diyaarisay Cishihii iyo taraawixdii..

Ramadaanteeda oo dhan waa sidaa Rootiinkeedu.

Haddaba walaashayda Muslimadda aheey! Xaalkaaggu sidee ayaad rabtaa in uu noqdo Bisha barakaysan ee Ramadaan? Ma sidaa **Salma** mise sidaa

Xannaan? Adiga ayaa dookha leh.

Nb: SALMA iyo XANNAAN waa tusaale uun, ee Gabadh kasta waa labadaa mid uun, sidaas oo kale Nin kastaana labadaa mid uun weeye, waxana laga yaabbaa Dumarku in ay meelo badan kaga sahlani yihiin Ragga! Oo soon-la'aanta bilaa cudur-daarka ah, Ragga iyo Dumarka, Ragga ayay ku badan tahay, Dhaqanno xunxun oo kale oo aanay Dumarku aqooninna baryahan Raggu way la soo baxeen.

QORE: AXMED DAAHIR (AXMED KHAYR)

WhatsApp: <http://wa.me/252634343306>

Telegram: <https://t.me/jannadoone>

Facebook: <https://www.facebook.com/axmedburcawi>